



太平寶訓政事紀年卷三

仁宗皇帝下

慶曆元年正月知延州范仲淹言元昊使其不僭中國之號而修時貢之禮亦可俯從今廊延是舊進奉之路蕃漢之所接也願朝廷敦天地包荒之量存此一路令諸路勒兵嚴備賊至則擊但未行討伐容臣示以恩意歲時之間或可招納若歲月無効遂舉重兵取綏宥二州擇要害而據之屯兵營田作持久之計如此則橫山一帶蕃漢人戶俱漢兵逼可以招降則是去西賊一臂

拓疆制寇無一舉之失也又請修治諸砦詔並從之

元昊犯涇原路懷遠砦韓琮以環慶摠管任福叅議軍

事耿傳涇原都監桑懌涇源行營都監英武涇州都監

王珪等戰于好水川福等死之 陝西僉書經略安撫

判官田况上兵策十七曰蕃落廣銳振武保捷皆是土

兵才力伉健藝強戰鬪嘗為先登不在東軍之後八曰

沿邊騎兵軍額高者無如龍衛間有不能披甲上馬况

其下者挽弓不過五六斗每教射皆望空發箭一二十

步即墜地以賊甲之堅縱使能中亦不能入密請料邊

兵益步而減騎但五分得一足矣以一騎之費可贍步

軍二人而又免括馬之擾出編年

二年正月契丹聚兵幽薊知中國用兵欲相恐動之出

實

知慶州范仲淹言臣前任延安初則請復諸寨為守禦

之備次則幸其休兵輒遣一介示招納之意朝廷以群

言之異未垂聽納今臣領慶州日夜思之乃知攻有利

害守有安危何則蓋攻其遠則害必至攻其近則利亦

隨守以土兵則安守以東兵則危臣所謂攻宜攻其近

而兵勢不危守宜固其久而民力不匱招徠之策可行
于其間且自古兵馬精勁西戎之所長也金帛豐富中
國之所有也禮義不可化干戈不可取則當任其所有
勝其所長此霸王之術也臣前知越州每歲納稅絹十
二萬和買二十萬一郡之人餘三十萬倘以啖戎是費
一郡之入而息天下之弊也出范文

三月簡河東弓手有武勇者不刺面為義勇指揮陝西
弓手為保捷指揮 親試進士楊寘以下賜及第

己亥契丹遣蕭英劉六符來議事求關南地其書以謂

元昊於北朝久已稱藩累曾尚王克保君臣之道實為

甥舅之親設罪合加誅亦宜垂報四月以知制誥富弼

報聘契丹且令許增歲賜以和出富公行狀

詔令中宮以下並不得衣銷金縷金蹙金陷金明金泥

金楞金背金欄金盤金織金線撚金等 詔三司減省

南郊支賜宰相樞密使舊銀絹四千叅政樞密副使舊

三千各減一千三司使一千減三百資政殿學士舊五

百翰林至樞密院事兼學士舊四百龍學三司副使舊

三百各減一百中丞給事中諫議知制誥待制舊一百

減十三自皇后至宗室命婦南郊支賜各減其半臣僚
以次第減之以為定式 國信使富弼還闕議歲增銀
絹各二十萬疋兩以和虜主欲國書用獻納二字弼拒
之 知延州龐籍以狄青築百安砦於延州元昊遣人
賚野利旺榮書至于籍求納款籍意其詐留不遣 契
丹遣耶律仁先劉六符來致書修好如前朝廷既不從
關南之請更增歲幣遂以誓書來出富公文

三年延州言元昊稱夏國遣賀從勉來納款 富弼資
政殿學士兼翰林侍讀學士與韓琦為樞密副使范仲

淹為叅知政事使蔡襄知諫院太學直講石介作慶曆
聖德頌以謂漢魏隋唐五代以來未有此選人之精得
人之多進人之速用人之盡實為曠絕盛事又曰惟仲
淹弼一夔一契天下不以為過出范公行狀

詔執政大臣非休暇不許私第見客初知諫院蔡襄建
請謂唐元和用兵時裴度為相請私第延見賓客以廣
謀慮今一切禁絕賓客非宜朝廷以諫官所當言也

天章閣侍講王洙集賢校理余靖秘閣校理孫甫知諫
院歐陽修同編修祖宗故事初樞密副使富弼上言自

古帝王理天下未有不以法制為首法制既立然後萬
事有經而治道可必也請選官縮三朝典故置兩府以
為模範故有是命而弼又注釋以為諫 上銳意以天
下事責成大臣而韓琦范仲淹富弼皆在二府望太平
于期月之間內出手詔賜韓琦等曰此以中外人望故
決用卿令韓琦暫往陝西仲淹弼與宰相章得象盡心
國事無或有所顧避其當世急務有可建明者悉為朕
陳之於是仲淹弼條上七事取士課吏減任子更戍兵
擇守宰謹教令厚農桑又上安邊十二策大略以進賢

能退不肖止僥倖去宿弊為本又欲漸易諸路監司之
不才者使澄汰所部吏請詔二府通選轉運如不足權
擢知州人既得人即委諸路自擇知州不任事者奏罷
之復令知州權擢幕職凡權入者必政績有聞一二年
方真授之不稱職者必行降黜直俟人稱職而後已
仍令久其官守忽復數易其有異政事宜就與升擢之
若然官修正舉則天下自無事矣朝廷摠其大綱而舉
之可也上然之

出范文

詔應宰臣使相互待制大卿監三司副使知雜依舊京

官餘並選人限半年赴銓投狀於尚書試論或試賦經
業律文及格者放選如三試不中有京朝官三人保舉
注遠小判司簿尉或不赴試又無人舉者並不理選編
年

四年太常禮院新修太常禮四十卷慶曆禮儀六十三
卷賜編修官賈昌朝以下器幣初景德中同知太常禮
院吳育言本院藏禮文故事未刊修請擇官類聚古今
制席叅定為一代法至是始上之 諫官孫甫請詔韓
琦田况將四路將臣能否為上中下三等其最下者黜

之如此則將帥得人而敵可制也

三月詔立學於諸

州府軍監除舊有學者餘並立學如學者及二百人以
上許更置縣學若州縣未能頓備即且就文宣王廟及
官屋宇為學仍委運司及長吏於幕職州縣官內奏選
充教授以三年為一任若少文學官可差即令許本學
舉人衆舉有德行藝業之人在學教授三年無私過本
處具教人數并本人業履事狀以聞當議特與推恩編
年

乙卯上于通英閣出御書十三軸凡三十五事一曰遵

祖宗之遵二曰奉 真考之業三曰念祖宗艱難四曰
思真宗養民五曰守信義六曰不巧詐七曰親碩學八
曰精六藝九曰慎言語十曰待耆老十一曰崇靜退十
二曰求忠信十三曰懼驕十四曰保勇將十五曰尚儒
術十六曰議釋老十七曰重良臣十八曰廣視聽十九
曰功無遺二十曰戒嘉怒二十一曰戒希旨二十二曰
從民欲二十三曰安民心二十四曰持滿盈二十五曰
傷暴露二十六曰哀鰥寡二十七曰訪鈞屠二十八曰
講遠圖二十九曰絕朋比三十曰斥諂佞三十一曰察
小忠三十二曰監迎合三十三曰罪己為民三十四曰
損已撫軍三十五曰求善使過又出危竿諭一篇述居
高慎危之意顧丁度曰朕觀書之暇取臣僚上言及進
封事中可施於政治者書以分賜卿等度暨魯公亮楊
安國王洙等既拜賜因請注釋其義上許之丁上荅通
英聖問一卷 上覽之終一篇指其中體大者六事付
中書樞密其略謂今奉宣示御書文字十三軸仰窺聖
旨皆陛下上念祖宗下畏政治述安危成敗忠邪善惡
之事然行此事在明與威斷爾明則不惑威則善柄斷

則能行摠是三者守而勿失非聖人孰能為之 上謂
輔臣曰朕每講讀宣敷經義于前代未嘗令有諱避近
講毛詩國風多刺譏亂世之事殊得為鑒戒也章得象
對曰陛下留心六經而能遠鑒前代興亡之迹茲誠圖
治之要也出寶訓

五月壬戌樞密副使韓琦叅知政事范仲淹對崇政殿
言朝廷若從元昊之和則北邊功下竭中國若拒絕之
則元昊必復大舉北戎亦須遣使問拒絕之意宜以和
好為权宜守戰為實務謹上四策其一以謂當高祖太

宗隆禮悖信而選將練兵彼不肯盟我則撫納無倦彼
將負德我則攻守有宜此和策之得也其二以謂守之
之計無如畜土兵新刺保捷不堪戰者宜沙汰之然後
三分東兵一屯邊以助土兵之勢一徙次邊或關輔以
息饋餉之勞一歸京師嚴禁衛之防彼如納款東兵更
可減三分之一其三以謂元昊巢穴實在河外河外之
兵懦而罕戰惟橫山一帶人馬精銳請于涇原環慶選
將佐三五人使臣一二十人步兵三萬騎三千訓以新
定陣法候其精勇然後觀賊之隙使三軍互掠於橫山

降者納質厚賞各使安土拒者并兵急擊必破其族其
四謂北戎久強今乘元昊議和因其邀功其勢愈重苟
不大為之脩禍未可量出寶訓

元昊始稱臣稱夏國主更名曩霄復遣尹與則楊守素
來奏事出事實

十一月審刑院斷監進奏院劉巽蘇舜欽並除名勒停
天章閣待制王洙集賢校理同約江休復王益柔太常
博士周延雋集賢校理張岷同修起居注李臻殿中丞
周延讓館閣校勘宋敏求將作監丞徐綬並落職降官

外任皆當時聞人言者為時相曰為相公一網打盡矣
眾莫不惜之是歲十月契丹與元昊戰于夏國境上

元昊敗之斬其國勇駙馬獲林牙太師初契丹與元昊
相約以因中國前年契丹背約與中國和獨受歲幣元
昊有怨詞故契丹來伐並出編年

五年契丹遣耶律宗睦來告討夏人回樞密副使韓琦
言朝廷以封册夏國又契丹以西征回來告當此之時
若便為太平無事則後必有大憂者三若前日之患慮
及經遠則後必有大利者一旦夷狄相攻者中國之利

此誠朝廷養謀觀釁之時也若能內葺綱紀外練將卒
休息民力率斂財用以待二虜之弊則幽薊靈夏之地
一舉而可圖此大利者也臣願陛下深思去大憂而取

大利出韓集

杜衍尚書左丞知兗州是時范仲淹富弼既去位衍力
留之不得又言者攻其壻蘇舜欽以搖之衍遂求去天
下賢士皆去位諫官歐陽修上書以仲淹弼琦皆一時
賢德不宜去位天章閣待制王質聞而歎曰天下所以
治者衆賢扶持之今賢者盡去吾不樂于世矣憂憤而

卒歐陽修又上朋黨議以為小人無朋惟君子有之故
漢唐以絕君子之朋而亡詔陝西河東經略司夏國雖
稱臣其令邊臣益練兵无得弛備 九月癸巳詔近臣

考先朝正史實錄為景德禦寇圖詔河北兵叛多務姑
息恐軍益驕密諭主兵臣僚當加撫御如犯軍律者聽
法外施行年出編

六年親試進士賈黯以下賜及第 四月壬子權御史
中丞張方平言臣向在翰林為學士見天聖中具負簿
兩制兩省官不及三十員今已五十員又領御史中丞

見本臺天聖班簿京朝官不及二千員今三千七百餘
員又常領三班院見景德中使臣不及四千員今六千
餘員又領吏部流內銓約在銓人今僅以萬計以此逐
處率適用一年半闕此罷任後差待闕五六年間未成
一任而又所養非所用所用非所養設其煩重之地不
免旋須擢人若仍舊不革恐數年間官濫不勝其弊其
中書樞密院自用兵以來權宜官請先裁從之 詔禮
部貢院自今開制科並隨貢舉為定制仍須近臣論薦
毋得自舉出編年

九年正月辛卯新作金輅玉輅 己亥慶曆編敕成

三月癸未詔天下官吏有寬恤民事附違以聞仍以別
本申運司詳利害較然可行者即施行之 十二月具

州軍賊王則反詔中書樞密院丞擇將撲滅之毋令奔
逸其令契丹賀正使由他路至出會要及編年

八年河北宣撫明鎬言今月十三日夜敗賊三百餘人
于具州西門初覘者言賊欲以十四日潛兵出邀契丹
賀正使行李而鎬先遣殿侍袁安率敢勇士設伏以待
遂擒之丙寅王則伏誅則涿州人歲飢流移具州投軍

遷十將初去鄉與母決刺福字於背以為記異具多妖術則習之欲為亂遂招衆以背自然隱起福字衆惑而事之州吏張釜卜吉為之謀主謀因各至郡官朝拜遂劫庫兵以叛會其黨潘方淨者以書謁北京留守賈昌朝執之故未及期而發 二月夏國遣人來告曩霄正月二日卒詔封其子諒祚為夏國主 復科場條制以

先朝所定宜一切無易

並出編年

皇祐元年四月甲子御崇政殿閱知澧州宋守信所獻衡衝無敵流星弩拒馬竹皮牌火鎌石火鋼順水山字

鐵甲野戰拒馬刀弩寨脚車衝陣劍輪無敵車大風翎

弩箭八種仍以所差本州兵馬使李錫為殿侍訓出寶

二年正月上謂輔臣曰今年有事南郊朕季秋行享明

堂之禮然自漢以來諸家論議不同將安所從宰相文

彥博對曰此禮廢久矣俟退而講求自聖朝行之 五

月戊申廣南西路轉運司言交趾發兵捕廣源州賊儂

智高其種皆遁伏山林詔本路嚴備之年出編

三年四月知諫院吳奎言文武二選官年七十而未引

去者乞勒令致仕 上御集賢閣講易至鼎卦上問九

四之象施于人事如何侍講楊安國曰鼎為烹飪成新之義上承至尊下又應物上承下施任重非據故足折而覆餗矣其猶任得其人雖重而可勝非其人必有顛覆之患上曰人不可不慎也出宝訓

四年正月廣源州儂智高反陷邕州橫山砦、主張日新邕貴都巡檢高士安欽橫同巡檢吳杳死之 五月

乙巳朔儂智高破邕州遂僭號司戶叅軍孔宗旦廣西路都監張立死之智高入橫州張仲回弃城辛酉入藤州李植弃城入梧州江滋弃城入封州曹覲死之壬戌

入康州趙師旦都監馬貴死之丙寅圍廣州前二日有告急者知州丁仲簡以為妄囚之又下令有言賊至者斬以故民不為亡計比賊至始令民入城踐死者甚衆餘者降賊番禺令蕭注突圍出募海上強壯兵得二千餘人與賊格鬪焚其舟船數百斬首五千護諸路援兵入城時廣南轉運使王罕方巡梅州聞之還召近縣弓手又起民兵兵部勒而下趣廣州賊來逆戰卻之 六月徙丁仲簡知荆南府是日廣州端都巡檢高士堯擊智高于市舶亭為賊所敗 七月儂智高解廣州圍由清

遠濟江而去初知英州蘇緘與本路提刑鮑軻洪州都
監趙保恭募兵八千餘晝夜兼行以赴援與賊戰得賊
謀主黃師宓之父斬之又誅遠近劫掠者而安復其百
姓時番禹令蕭注數出戰燒賊船賊逸緘先備兵斷歸
路多不得脫而廣東鈴轄張忠及蘇緘與賊戰于白曰
忠及虔州巡檢董玉等死之年出編

九月御延英閣召賈昌朝講乾卦因謂侍臣曰昌朝位
將相而執經侍講朝廷盛事也翌日昌朝手疏乾卦大
旨在上九一丈夫又在亢極必有凶災不即言凶而言

亢龍有悔者以悔中有可凶可吉之象者修德以濟世
則免悔而獲吉也手詔嘉之仍付館史出寶

以樞密副使狄青為荆湖北路都大提舉廣南西路經
略盜賊仍諭以回日依舊樞密院十月丙子狄青言自
智高寇嶺南諸將專用步軍抗乘高履險之賊故每戰
必敗請下陝西擇番落廣銳軍曾戰陣者各五十人仍
遣使臣押赴行營從之詔廣南將佐皆稟青節制孫沔
余靖分路討擊亦聽狄之指揮甲申智高復入邕州出編
年

上謂輔臣曰上封事言政闕失者少豈非言路壅塞所致乎其下閣門遞進銀臺登聞檢進奏自今州縣奏請及臣僚表疏毋得阻留 十二月侍講王洙知制誥蔡襄上所書無逸孝經因時侍講楊安國請書無逸于通英閣之後屏上曰朕不欲背聖人之言當置之左方命侍講丁度取孝經之天子至治聖治廣要道四章為右圖因令襄書無逸洙書孝經又命翰林學士王拱辰為二圖序而蔡襄書之 諫官韓絳因對而言曰天子之柄不可下移事當間出睿斷 上曰朕固不憚自斷

所慮未中於理而有司奉行則其害已加于人故每欲

先盡大臣之慮而後行之

並出寶訓

五年正月狄青斬廣西鈐轄陳曉及裨校三十二人于賓州狄青敗智高于歸仁鋪智高廣源州蠻也自交趾竊據而廣源州多役服之州在于邕管西南初知儻猶州儂全福殺其弟并其地交趾怒慮全福及其子以歸其妻阿儂嫁商人坐智高而冒儂姓奔當火洞出據儻猶州建國曰大曆交趾拔儻猶州執智高釋之使知廣源州四洞附以思浪州居四年攻交趾安得州據之僭

號南天國王皇祐元年寇邕州廣西轉運使蕭曰使邕
州指使并貳刺候之而貳擅發兵攻之為智高所執且
問中國虛實貳為陳大略勸智高內屬由是遣貳還并
奉表願歲貢遂賚金函書請獻金錢朱硃知邕州陳珙
以其事聞朝廷以交趾方內屬不欲失其意遂不報智
高既不得請又與交趾為仇且擅山澤之利遂招納亡
命數出敝衣易禾米給言飢部落離散邕州信其微弱
不設備乃與廣州進士黃瑋黃師宓等謀為寇破邕州
僭號仁惠皇帝建元啟曆赦境內黃師宓以下皆稱中
國官名相繼破貴襲潯藤梧封康端等州進圍康州凡
五十三日而去復據邕州方青會賓客于州既斬陳曉
軍中股栗下令更十日進軍謀者去青即鼓行而前取
崑崙閩晨起整大將旗鼓諸將環立帳前待令乃發而
青以微分與先鋒度閩令趣諸將會食閩水既至邕州
歸仁鋪遇賊分三陣以進青以張玉為先鋒賈逵將右
孫節將左青誓曰不待令而舉者斬賊攻左孫節戰死
逵恐復為賊所縛引右軍趨山而陣賊至逵揮劍擁眾
而下斷賊為二玉突戰出賊前橫貫賊壘青執旗鼓麾

左右蕃落出賊後賊潰橫尸十五里斬首三千餘級俘
獲萬計智高由合江奔大理國擒偽官黃師宓等五十
七人餘衆悉降二月丙子 上謂輔臣曰狄青以破賊
立功將士宜速賞苟賞不及功則不足勸因言朕嘗觀
魏太祖雄才大略然多譎詐借人命而收已息唐莊宗
亦雄傑之器行兵動師舉無失策及即位游獵無節賞
罰不時此二主者特將帥之才而無人君之量惜哉癸
亥進狄青樞密副使宣徽南院使 三月親試進士鄭
獬以下賜及第 初智高叛 上以青為宣撫言者以

青武人不可專任 上以問大臣宰相龐籍對曰青起
行伍若以文臣副之彼視為何者不如不遣上乃詔嶺
南並受青節度乃奏捷上喜顧籍曰向不委青專制豈
能成功如是之速也 上欲以青為樞密同平章事籍
曰昔太祖時慕容廷釗一舉而得荆湖南之地不過遷
官加爵邑賜金帛不以為樞密曹彬平江南擒李煜欲
求使相太祖不與賜錢二十萬此陛下所當法也若忽
與青名位之極它日更立大功以何官賞之 上初從
之卒以青為護國軍節度使檢校太傅宣徽南院使樞

密副使諸子皆超官賜金帛甚厚 試賢良方正直言
極諫趙彥明以不中等罷之 十二月丁酉廣南西路
安撫司言大理評事黃汾邕州司戶石鑑同道州進士
吳舜舉等獲智高母阿儂并子弟四人護送至京師事出
實

至和元年正月丙寅朔解通天犀和藥以療民疫初京
師大疫令太醫進方內出犀兩株其一通天者內侍李
舜舉請以為御帶上曰吾豈愛此不以救民乎命碎之

出寶
訓

五月知諫院范鎮言願詔中書樞密院大臣考正祖宗
自建隆至寶元中官吏之祿廩與夫四夷之歲賜立馬
之屯戍而斟酌之庶國用有餘年出編

九月侍講楊安國講周禮至大荒大札則薄征緩刑者
以為過誤之民當歲歉則貫之憫其窮也今衆持兵仗
劫糧廩一切寬之恐不足禁奸上曰不然天下皆吾赤
子也一遇飢饉州縣不能存卹飢饉所迫遂至為盜又
捕而殺之不亦甚乎 壬申御延英閣侍講王洙講周
禮至三年大比則大攷州里以贊鄉大夫廢興 上曰

古者選士三歲則大計最為酌中今四五歲始下一詔
得無抑多士乎不若裁減取人之數稍近古制俾精于
攷擇則天下無遺滯之才矣

出室
林

范鎮又疏曰臣去年八月言方今官冗兵多民疲不堪
請下中書樞密院大臣條理究行累月不報夫兵不在
衆在練之與將如何耳儂智高寇嶺南前後遣將不知
幾軍遣兵不知幾萬亡命奔北不復勝數陛下親遣狄
青然而卒能取勝者蕃落數百騎耳此不在衆事之可
驗也臣愚以為備契丹莫若寬河北河東之民備靈夏

莫若寬關陝之民備雲南莫若寬四川湖嶺之民備天
下莫若寬天下之民。力寬則知自愛雖有外虞人
可用為民矣自愛民以禦外虞何往而不服

出范
公集

二年二月己丑以汾州推官郭固為衛尉寺丞初韓琦
知并其并州固嘗造車戰法琦以謂可用於河北平川
之地一則臨陣以抑奔衝二則下營以為砦脚今固自
賫車式詣闕進呈既試用之而有是命 四月知諫院
范鎮言乞教大臣考今兵數與夫賦之數立為經制乞
罷土木之費使民得足食而少休息 又言周之冢宰

制國用唐宰相兼鹽鐵轉運然則宰相制國用從古然也今中書主民樞密主兵三司主財各不相知故財已匱而樞密院益兵不已民已困而三司取財不已中書視民之困而不能使樞密院減兵三司寬財以救民困者制國用之職不在中書也欲令中書樞密通知兵民財利大計與三司量其出入制其國用則天下民力庶几少寬

又言宜敕大臣具三朝與天聖中賦入若干官若干及今賦入之數與兵所管數約取中道立為經制以賦入之數十分為率以七分養兵養官及郊廟宮省之費以三分備水旱緩急非常為之十年近可言治

出編年

六月阿儂伏誅初狄青既破賊留蕭注知邕州使圖智高注得石鑑不殺使擒智高母弟檻送闕下朝廷留之以招智高注又募死士使大理國求智高重譯得至會智高已為大理所殺函首至京師始殺阿儂 右諫議大夫李東之言今選舉之路未精陰補之門太廣恩倖之路未塞因緣之路未除往年減省蔭補近臣之家靳息厚恩務念全已但于服屬疏者舉行數事而已使天

下議論多不厭服率由措置之未公也大凡立法自貴始則人無怨心請先自嬪御宗室兩府大臣以至帶職負外諸司副使以上內臣之家一切裁減之十年當見成功于是中書先請自二府宣徽節度遇南郊仍舊奏二人而罷乾元壬子詔兩制臺諫定議以聞並出編年

嘉祐元年知諫院范鎮上言 太祖舍其子而立 太

宗 真宗取宗室之子養之宮中願以 太祖為心行

真宗之事并州通判司馬光亦上言陛下好學多聞且以前古之事迹治亂安危之机何嘗不由繼嗣哉蓋

得其人則治不得其人則亂分先定則安不先定則危得失之机間不容髮於朝廷至大至急之務孰先於此

願斷自聖慮謹擇宗室之中聰明剛正孝友仁慈者使攝儲貳之位以俟皇嗣之生退居藩服倘未欲立或且之輔政或領京邑或點宿衛亦足以鎮定天下之心出司

馬公集

以草澤黃晞為太學助教晞建安人通經聚書數千卷學者多從之著聲隅書十卷自號聲隅子慶曆中石介在太學遣諸生以禮召之不至，是樞密使韓琦薦之

受命而卒出類苑

二年七月辛卯命翰林承旨孫抃權中丞張昇磨勘諸路提轉考績初知諫院陳升之上監司選用責任考課之法出寶訓

九月庚子契丹遣樞密副使蕭扈來求御容 十月乙

巳翰林學士胡宿報契丹累求 真宗及 上御容御

容至虜中虜王具儀仗迎謁及瞻視驚肅再拜而退謂

左右曰天日之表神異如此真聖人也我若生中國不

過與之執鞭持蓋一都虞候耳出事實及編年

十二月戊申詔自今間歲以開科場天下進士諸科並

解舊額之半出編年

三年翰林學士韓絳等詳定放行茶法初著作郎何禹

上疏請一切通商收諸處淨利所過住之稅歸權貨務

以還沿邊入中糧草之直出會要

試賢良方正孫洙進論五十篇皆陳祖宗政事指摘治

體人目之為經緯集韓琦見而歎曰今之賈誼也出類苑

四年二月詔以陝西民間多盜鑄大錢以至市易不通

其以見行當三大銅錢折小銅錢之二 三月丁未親

試進士劉瑋等賜及第 辛卯詔凡宮室之制器用之
度冠服之章妾媵之數其令中外遵行所降詔條違者
御史臺開及封府糾察以聞諸郡即委提轉如詔施行

並出
編年

詔先降兩制臣寮不許至執政第及兩府大臣常舉所
薦者不得為臺諫條約並除之出寶訓

五年三月刑部李誕言天下上刑部一歲之中死罪無
慮二千五百六十人其背犯逆凡百三十人夫風俗之
薄無甚于骨肉相殘衣食之窮莫急為盜賊今犯法之

衆豈刑辟不足以止奸而教化未能導而為善欤 五
月詔自今臣僚而有輒上封章告人罪及以赦前事言
者並許劾之言事之臣雖許風聞宜務大體如事關朝
政無憚極論其餘小過細故勿須察舉詔有司遏浮競
之風其令中書門下務採端厚忠寔可以表勵俗之士
並進於朝以啟迪朕心其詭激辨切敢涉朋比之迹必
行放棄之罰庶幾朝廷清明百異消弭以期治平並出
編年

六年五月翰林學士歐陽修薦眉州蘇洵學行且以所
撰權書上之詔試校書郎出蘇公
行狀

閏八月知江州呂誨上疏請立皇太子遣使諸路省民間疾苦安令異政官惠及民者與再任諫官司馬光

上疏乞立皇太子宰臣韓琦以誨光二疏言于上出編年

九月詔皇姪濮王之子英宗御名判宗正司事固辭

七年八月詔立皇姪英宗御名

八年二月親試進士許將以下賜及第辛未帝崩于福

寧殿聖壽五十四在位四十二年葬永昭陵

英宗皇帝

英宗體乾膺曆隆功盛德憲文肅武睿哲宣孝皇帝

太宗曾孫濮安懿王第十一子嘉祐七年八月己卯

立為太子年二十三嘉祐八年三月辛未奉遺詔即

皇帝位

治平元年甲辰正月改元十一月籍陝西鄉丁為義勇軍

及令環慶廊延所撥保義軍為義勇初宰臣韓琦言今

之義勇河北幾十五萬河東幾萬勇悍純寔出於天性

而又有物力資產父母妻子之所係若稍加揀練亦唐

之府兵也凡得義勇十二萬二千五百人

二年放禮部進士彭汝礪等及第

三年九月癸亥初令待制以上六年磨勘至諫議止京
朝官

四年磨勘至前行郎中止鄉監以七十為定負有缺即
補詔自今年三年一開科場

五年正月庚戌上不豫降德音赦四京畿丁巳晏駕福
寧殿聖壽三十八在位五年葬永厚陵年出編

太平寶訓政事紀年卷三

